

Bosna i Hercegovina
Federacija Bosne i Hercegovine
Srednjobosanski kanton
OPĆINA GORNJI VAKUF – USKOPLJE
OPĆINSKO VIJEĆE

Broj: 01-04.1- /21
Datum, 29.07.2021.godine

Z A P I S N I K

sa 5. sjednice VI saziva Općinskog vijeća općine Gornji Vakuf – Uskoplje, održane 15. jula 2021. godine u Velikoj sali Općine Gornji Vakuf - Uskoplje, sa početkom u 10⁰⁰ sati.

Sjednici su prisustvovali izabrani vijećnici Općinskog vijeća, Općinski načelnik Čaušević Sead, Sekretar općine Prijjić Senad, Pomoćnici načelnika – Milić Nikola, Šišić Suad, Matijanić Branko, Šain Branko, po ovlaštenju načelnika Pomoćnik načelnika Milanović Adnan, Biro za zapošljavanje Filipović Amir, direktor JKP „VIK“ Blažević Igor, direktor JKP „Radovina“ Šehić Nahid, zamjenica komandira Policijske stanice Gornji Vakuf-Uskoplje Šarić Jelena, Sveučilište „Vitez“ Kraksner Amra, Dukić Siniša, Fišić Darija, Predsjednik OO SDA Gornji Vakuf Milanović Sedžad, predsjednik OO SBB Puljarga Sabahudin.

Sekretar općine Prijjić Senad, je izvršio prozivku prisutnih vijećnika, tako da su na sjednici bila prisutna 22 vijećnika i to: Karahodžić Alisa, Duratbegović Nijaz, Milanović Emir, Zahirović Armin, Duvnjak Majda, Brzika Amra, Šupčić Nesib, Muminović Elma - SDA, Novaković Ana, Batinić Goran, Krajina Marinko, Novaković Marin, Jurina Danijela, Posavac Ivo, Jurleta Franjo, Žuljević Ivica – vijećnici Hrvatske liste HDZ BiH, HDZ 1990, HSP BiH i HSS Stjepan Radić, Gekić Edin, Karamustafić Naser (otišao sa sjednice u 13⁰⁰), Hajrić Amel, Crnica Kenan – BH BLOK, Abazović Muris-SBB, Lelak Selvedin -nezavisni vijećnik.

Odsutan Kičin Kadir - BH Blok

Sjednicu je otvorio predsjednik Općinskog vijeća Gornji Vakuf – Uskoplje Batinić Goran, koji je pozdravio prisutne vijećnike i predložio je na usvajanje sljedeći

DNEVNI RED:

1. Vijećnička pitanja
2. Usvajanje Zapisnika sa 4.redovne sjednice Općinskog vijeća Gornji Vakuf-Uskoplje
3. Nacrt Strategije razvoja Općine Gornji Vakuf-Uskoplje za razdoblje 2021-2027 godina
4. Informacija o radu Policijske stanice Gornji Vakuf-Uskoplje za 2020.godinu
5. Informacija o radu Biroa Gornji Vakuf-Uskoplje Službe za zapošljavanje SBK za 2020.godinu
6. Izvještaj o poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu
7. Izvještaj o radu JKP «Radovina»d.o.o. Gornji Vakuf-Uskoplje za 2020.godinu i Plan poslovanja za 2021.godinu
8. Informacija o stanju i raspolaganju općinskom imovinom
9. Prijedlog Odluke o prestanku važenja Regulacionih planova na području Općine Gornji Vakuf-Uskoplje
10. Prijedlog Odluke o izmjenama i dopunama Odluke o usvajanju i sprovođenju urbanističkog plana grada Gornji Vakuf, skraćeni postupak
11. Prijedlog Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, skraćeni postupak
12. Prijedlog Odluke o izmjeni Odluke o sigurnosti prometa na cestama i ulicama Općine Gornji Vakuf-Uskoplje, skraćeni postupak
13. Prijedlog Odluke o utvrđivanju Liste istaknutih stručnjaka Općine Gornji Vakuf-Uskoplje za popunu Komisije za koncesije
14. Razmatranje inicijativa Kluba vijećnika BH Blok:

- a) Inicijativa od 07.04.2021.godine
 - b) Inicijativa od 07.04.2021.godine
15. Prijedlog Odluke o izmjeni Odluke o sastavu Kolegija VI saziva Općinskog vijeća Gornji Vakuf-Uskoplje

Diskusije:

Crnica K.-BH Blok

- Predlažemo da se inicijativa pod b). od 07.04. 2021. godine skine s dnevnog reda današnje sjednice
- Predlažemo dopunu dnevnog reda sa tačkom; *Prijedlog Odluke o direktnom medijskom prenosu sjednica Općinskog vijeća Gornji Vakuf-Uskoplje*

Batinić G.- predsjednik OV-a

- Dajem na glasanje prijedlog BH Bloka da se uvrsti u dnevni red; *Prijedlog Odluke o direktnom medijskom prenosu sjednica Općinskog vijeća Gornji Vakuf-Uskoplje*

Prijedlog Odluke o direktnom medijskom prenosu sjednica Općinskog vijeća Gornji Vakuf-Uskoplje nije usvojen (6 „za“, 0 „protiv“, 16 „suzdržanih“)

Batinić G.- predsjednik OV-a

- Sada dajem na glasanje predloženi dnevni red

Predloženi Dnevni red sa usvojenom dopunom usvojen sa većinom glasova (17 «za», 0 „protiv“, 5 „suzdržanih“)

Ad. 1.

Vijećnička pitanja

Odgovori i Nova vijećnička pitanja:

Ivica Žuljević - HDZ BiH

- Zadovoljan sam odgovorima koje sam dobio, nadam se da će zaposlenici navedene službe izaći zajedno sa predstavnicima mjesne zajednice i sagledati situaciju što se tiče postavljanja ležećih policajaca u MZ Ždrimci
 1. Zadnjih dana svjedočimo uklanjanju i pokušaju uklanjanja postavljenih objekata na javnim površinama. Tražimo informaciju od Načelnika o primjeni odluke o privremenom korištenju javnih površina. Nad koliko je postavljenih objekata izvršen nadzor o ispravnosti i usklađenosti s navedenom odlukom, te koliko je do danas izdano rješenja o uklanjanju postavljenih objekata na javnim površinama ?
 2. Informacije s terena govore o pojačanoj aktivnosti urbanističko-građevinskog inspektora odnosno obilasku pojedinih objekata u izgradnji i nadzoru nad legalnosti istih. Tražimo informaciju od Načelnika da li Općina Gornji Vakuf Uskoplje posjeduje registar nelegalno izgrađenih objekata na području općine, te da li je urbanističko – građevinski inspektor izvršio nadzor nad već svim izgrađenim objektima prije nego je počeo nadzirati objekte u izgradnji ? Da li izgrađeni objekti imaju sve potrebne dozvole i jesu li u skladu s važećom prostorno-planskom dokumentacijom?

Marinko Krajina - HDZ BiH

1. Obzirom da se u posljednje vrijeme vrši zamjena betonske podloge sa umjetnom travom na malonogometnim igralištima, planira li općinski načelnik isto napraviti na malonogometnim igralištima u MZ Dobrošin, Podgrađe i drugima ?
2. Prilikom nevremena u 9- om mjesecu prošle godine, srušen je stub od ulične rasvjete u naselju Hrasnica. Oboren stub je pod naponom i predstavlja opasnost. Apeliramo na načelnika i nadležnu općinsku službu da riješe navedeni problem !

Nesib Šupčić - SDA

1. Kada se planira riješiti pitanje neregistrovanih motora (motocikli) u našem gradu ?

Amel Hajrić - BH Blok

- Zadovoljan sam odgovorima koje sam dobio na neka pitanja, na neka djelomično
 - Želio bih se zahvaliti što je Općina prepoznala prošla pitanja koja sam postavio, odgovorila je djelom, ne pismeno i zahvalio bih se Načelniku za urađeno u MZ Bojska, nadam se da će se nastaviti ovakva praksa uvažavanja pitanja opozicije i ubuduće.
1. Postoje li u općini ikakvi planovi vezani za postavljanje table sa nazivom za selo Bojska i njenih zaseoka koja su trenutno neobilježena. Ako postoje planovi za postavljanje pomenute table sa obilježjem, možete li reći kada će to biti ?
 2. Da li općina ima u planu sanaciju poljoprivrednog puta Vilić Polje-Hrasnica-Pajić Polje-Humac tj. put - dio trase stare pruge. Put je od velikog značaja za poljoprivrednike pomenutih MZ.

Edin Gekić - BH Blok

1. Pitanje za SDA i HDZ, imate li strategiju kako zaustaviti masovan odlazak stanovništva iz Gornjeg Vakufa- Uskoplja ?
2. Kada općinska vlast planira uraditi rekonstrukciju lokalnog puta u Bistrici od Deveća do spajanja sa mostom Trnovače ?
3. Zašto nije urađen vodovod u Bistrici, ko je odgovoran zbog nedovršenog projekta priključenja na nove vodovodne cijevi ?
4. U MZ Centar tj. slijepa ulica koja ide iz Preporodove uraditi 3 rasvjetna tijela.

Usmeni odgovori na vijećnička pitanja

Nije bilo usmenih odgovora

Ad. 2.

Usvajanje Zapisnika sa 4. redovne sjednice Općinskog vijeća

Diskusije:-

Zapisnik sa 4. redovne sjednice Općinskog vijeća usvojen sa većinom glasova (21 „za“, 0 „suzdržanih“, 1 „protiv“)

Ad. 3.

Nacrt Strategije razvoja Općine Gornji Vakuf-Uskoplje za razdoblje 2021-2027 godina

Kraksner A.-ispred predlagača

- Dala je kratko obrazloženje Nacrta Strategije razvoja Općine Gornji Vakuf-Uskoplje za razdoblje 2021-2027 godina

Diskusije:

Šišić S.-Pomoćnik načelnika

- Izrada Strategije razvoja Općine Gornji Vakuf-Uskoplje za razdoblje 2021-2027. godina je se odvijala u vremenu pandemije COVID 19. što nam je otežavalo i usporavalo rad
- Svi članovi Radne grupe za izradu Strategije su dali svoj doprinos na radnim sastancima
- Ova Strategija razvoja Općine Gornji Vakuf-Uskoplje za razdoblje 2021-2027. godina je dosta realna i ostvariva kao i prethodna
- Želio bih naglasiti da svi oni koji imaju određene primjedbe, prijedloge i sugestije da ih mogu poslati Radnoj grupi na razmatranje

Karamustafić N.-BH Blok

- Hvala Vama što ste došli, mislim da je ovo treća ili četvrta Strategija od kada sam ja vijećnik u Općinskom vijeću, sve su bile pohvalne, sve su bile dobre, ali da bi se ostvarile mislim da bi trebali postojati neki uslovi
- Kakvi su to uslovi i pred uslovi ostvareni na našoj općini, možemo vidjeti da nam fale dva naselja i dvije hiljade ljudi koji su otišli.

- Trebamo stvoriti pred uslove na terenu da bi se ljudi mogli baviti poljoprivredom i stočarstvom u ruralnim naseljima

Puljarga S.-predsjednik OO SBB

- Strategija je dosta detaljno urađena i pregledna, ali se ne bih složio sa prioritetima koji su navedeni
- Ako uzmemo u obzir broj ljudi koji su zaposleni u metalnoj, drvnjoj industriji i broj zaposlenih u poljoprivredi, može se vidjeti da je razlika ogromna. Kolike su plate u metalnoj industriji, kolike su plate u poljoprivredi.
- Kod nas su poljoprivredne parcele usitnjene i zbog toga je se vrlo teško baviti profesionalno poljoprivredom i od toga živjeti.
- Dosada nismo uspjeli formirati poljoprivrednu zadrugu jer neće niko da se bavi time, kod nas se poljoprivredom bave samo penzioneri
- Mislim da smo na prvo mjesto trebali staviti metaloprerađivačku i drvenu industriju, zatim Informatički sektor, tamo gdje su plate puno bolje i gdje će se zadržati ljudi na ovim projektima.
- Nigdje se ne spominju strana ulaganja, imamo li mi namjeru privući i jednog stranog investitora, mislim da nam fali malo marketinga u vezi ovoga.
- Samo na jednom mjestu se spominje pisanje projekata za fondove od Evropske unije
- Ne stoji podatak da su sve škole na općini dobro opremljene, OŠ Gornji vakuf nema svoju fiskulturnu salu (koristi Sportsku dvoranu za izvođenje nastave)

Crnica K.-BH Blok

- Pošto je ovdje riječ o Nacrtu, ukazat ću na neke proceduralne greške; kad je u pitanju stanovništvo,... *Ostalih je stavljeno 0%*, ima ovdje koliko znam Ostalih, nisu svi ni Bošnjaci, ni Hrvati ni Srbi, treba to ispraviti
- U ovoj Strategiji od 2021-2027 godine stoji da je planirano da se daju sredstva za poljoprivredu od 25.000,00 KM, povećanje prodaje organskih poljoprivrednih proizvoda za 15%, dok u istom tom periodu za „neko skijanje“ se daje 70.000,00 KM, mislim da su nam malo pomiješani prioriteti
- Planirana sredstva za industrijsku zonu su 500.000,00 KM, interesuje me dali su u izradu ove Strategije uključeni naši privrednici, ko je predstavljao sportske kolektive i ko je osoba iz turizma koja je učestvovala u izradi strategije.

Kraksner A.-ispred predlagača

- Kad je u pitanju infrastruktura, stoji da će se raditi na održavanju i izradi novih puteva na općini
- Kad je u pitanju poljoprivredna proizvodnja, akcent je stavljen na Organsku poljoprivrednu proizvodnju koja može podnijeti i usitnjeni poljoprivredni prostor, u biti cijene takvih proizvoda su puno veće u odnosu na ove tradicionalne
- Metalna, Drvna i Informatička proizvodnja su stavljene u razvoj malog i srednjeg poduzetništva
- Imamo par projekata u kojima stoji da se planiraju strana ulaganja u realizaciji istih, akcent je stavljen na dijasporu
- Kad je u pitanju opremljenost škola rekli smo da su one relativno dobro opremljene, ovdje se radi o jednoj školi koja nema fiskulturnu salu dok druge imaju
- Budžet je urađen u konsultaciji sa finansijskim odborom i mogućnostima, kako je to i dosada rađeno
- Kad je u pitanju stanovništvo općine, podatke koje smo uzeli od institucija čiji je to posao da rade, mi ih ne možemo mijenjati. Ako Vi imate podatke o broju "*Ostalih*" na općini, nije nikakav problem da se on uvrsti u ovu strategiju

Batinić G.-predsjednik OV-a

- Prije samog glasanja o Nacrtu Strategije razvoja Općine Gornji Vakuf-Uskoplje za razdoblje 2021-2027. godina, želim napomenuti da se shodno članu 81. Poslovnika o radu OV-a Gornji Vakuf-Uskoplje, ovaj Prijedlog donosi dvotrećinskom većinom vijećnika, uključujući natpolovičnu većinu vijećnika jednog i drugog naroda

- Sad dajem na usvajanje sljedeći Zaključak: *Prihvata se Nacrt Strategije razvoja Općine Gornji Vakuf-Uskoplje za razdoblje 2021 - 2027 kao dobra osnova za izradu prijedloga Strategije razvoja općine, te utvrđuje obaveza Radnoj grupi za izradu strategije razvoja Općine Gornji Vakuf-Uskoplje da provede Javnu raspravu, da na osnovama nacrtu Strategije razvoja Općine Gornji Vakuf-Uskoplje, prijedloga i sugestija sa Javne rasprave i prijedloga i sugestija vijećnika Općinskog vijeća sa ove sjednice, utvrde i dostave prijedlog Strategije razvoja Općine Gornji Vakuf-Uskoplje za prvu narednu sjednicu Općinskog vijeća Gornji Vakuf-Uskoplje.*

Zaključak o Nacrtu Strategije razvoja Općine Gornji Vakuf-Uskoplje za razdoblje 2021-2027.godine usvojen sa većinom glasova (18 „za“, 4 „suzdržana“, 0 „protiv“)

Ad. 4.

Informacija o radu Policijske stanice Gornji Vakuf-Uskoplje za 2020.godinu

Šarić J.-Zamjenik komandira PS

- Dala je kratko obrazloženje Informacije o radu Policijske stanice Gornji Vakuf-Uskoplje za 2020.godinu

Diskusije:

Karamustafić N.-BH Blok

- Imam jedno pitanje za vas, zašto Vaši službenici, policajci naplaćuju kazne na mjestu gdje nije predviđena kazna zato, i zašto se ponašaju nasilnički kada su u pitanju neke druge stvari
- Lično sam imao takvo iskustvo, u pitanju je bio smrtni slučaj išao sam da dam injekcije za članove porodice preminulog. Nije bio znak zabrane parkiranja, na mobitelu imam snimak tog prostora gdje se vidi da nema nikakvog znaka zabrane
- Na sudu su rekli da sam parkirao na pješačkom prelazu, pa su rekli da je tu pješačka staza što nije istina jer nema ni znaka, na Općinskom vijeću nismo nikad donijeli Odluku za pješačku stazu bilo gdje u gradu
- Zato Vas molim, radi mene, radi svih nas, radi sigurnosti, meni je pedeset godina ružno je da mi neki balavac zavrće ruku, bez obzira ko sam, bez obzira šta sam uradio
- Zamolio bih Vas da im skrenete pažnju na njihovo ponašanje jer mi iz Doma zdravlja smo direktno povezani i saradujemo sa policijom i kada su u pitanju saobraćajne nesreće ili nešto drugo.

Čaušević S.-Općinski načelnik

- Zahvaljujem se gospođi Jeleni koja nam je podnijela iscrpnu informaciju o svim dešavanjima, možda je to trebao uraditi neko drugi da podnese ali nažalost u nekoliko godina ovdje je predstavnik PS Gornji Vakuf-Uskoplje gospođa Jelena i ona iznosi te podatke, zašto ne podnosi neko ko je odgovoran moramo se svi zapitati zbog čega je to tako.
- Svjesni smo da smo zbog pandemije i policijskog sata imali manji broj krivičnih djela, što je dobro za našu općinu
- Nažalost u odnosu na 2019. godinu imali smo povećan broj djela narušavanja javnog reda i mira u svim segmentima
- Isto to se nastavlja i u ovoj godini kontakti, prijetnje, zastrašivanja itd., upućene ne samo vijećnicima nego i državnim službenicima, napadi na službena lica koja rade svoj posao.
- Interesantno je da se to radi standardno od jednih te istih lica, radi se o tome da su ograničene i ugrožene slobode ljudi, koja su zagarantovana svim konvencijama o ljudskim pravima i slobodama
- Ono što očekujemo od pripadnika policijske stanice, od ljudi koji su zaduženi za našu sigurnost i sigurnost svih građana ove općine, u najmanju ruku da se ponašaju

profesionalno bez obzira o kome se radi.

- Nekada se zapitam dali sam siguran u ovo što radim, zbog pritiska određenih ljudi, zastrašivanja porodica, bližih srodnika i pitam se dali me može zaštititi ova država, nadležni policijski organi, pravosudne institucije i kako se ponašati u budućnosti.
- Zbog svega navedenog, apelujem na Policijsku stanicu, odnosno na njene organe, na pravosudne organe da nas zaštite od takvih osoba da možemo slobodno šetati gradom, a ako to nisu u stanju uraditi, onda da mi tražimo zaštitu od viših nivoa vlasti u pogledu zaštite naših prava i sloboda.

Novaković M.-ispred kluba HL

- Želim iskoristiti priliku da se zahvalim Policijskoj stanici na svemu urađenom u 2020. godini, znamo da je bila pandemija, policajci su u saradnji i koordinaciji sa zdravstvenim radnicima uradili dobar posao, za to im treba čestitati i dati im podršku da i dalje rade
- Zanima me mišljenje policije, odnosno struke, dali u „Gradskoj ulici“ zbog veće sigurnosti saobraćaja odnosno smanjenja brzine kretanja vozila, treba uraditi fizičkim preprekama ili radarima.
- Mislim da je puno lakše ograničiti brzinu kretanja vozila fizičkim preprekama, „ležećim policajcima“ nego radarima.

Crnica K.-BH Blok

- Želim da kažem da smo mi predlagali i razgovarali na temu narušene sigurnosne situacije uslijed političke krize na općini, danas je Načelnik iznio sve ono o čemu smo mi tada htjeli da razgovaramo
- Kažete da Općinske službe i općinski službenici rade pod pritiskom, prije svega treba pitati rade li po zakonu
- Dali je po zakonu da bez ikakvog naloga dođete na nečiji privatni posjed u pratnji policije?
- Policajci su se pretvorili u predstavnike „Udba“ u Gornjem Vakufu-Uskoplju, ispijaju kafe i gledaju ko s kim sjedi. Oni ne podnose izvještaj Vama, podnose izvještaj g-dinu Milanoviću i kome već, Načelniku podnose izvještaj.

Batinić G.-predsjednik OV-a

- Ne želim da Vas prekidam, zamolio bih Vas da ne koristite termine kao što je „Udba“ i itd., nemojte molim vas koristiti takve termine i nemojte vrijeđati ljude. Ovo je već drugi put da vrijeđate ljude, prošli put ste ljude nazivali „Uhljebima“ danas „Udbašima“, nemojte vrijeđati ljude.

Crnica K.-BH Blok

- Vaš je problem što konstantno branite i kad treba i kad ne treba, imaju ljudi neka repliciraju na moj govor, nemate potrebe svaki put predstavljati njihovog advokata
- Vi ste Načelnice jedan od krivaca zbog ovakve cjelokupne situacije u gradu, i vi i osobe koje su do 2020. godine u političkom životu bile zajedno, nažalost vidite samo jednu stranu. Šta je sa običnim građanima i oni imaju iste probleme kao i Vi.
- Na Policijsku stanicu se vrši pritisak i Vi ste jedna od osoba koja u isto vrijeme vrši pritisak.

Čaušević S.-Općinski načelnik

- Ako ovaj Načelnik neradi po zakonu kao što Vi to kažete i tvrdite, i ove Općinske službe, imaju organi koji to također prate, Načelnik nije izuzet od bilo kakvih pravnih posljedica. Nije dobro da neko dolazi i zastrašiva, trebamo vidjeti i razumjeti zbog čega to radi, imamo institucije koje trebaju da rade svoj posao, ne treba niko nikom da prijeti.
- Rekao si g-dine Crnica da je Načelnik glavni krivac za ovakvu situaciju po pitanju sigurnosne situacije, molim te objasni mi šta sam ja to uradio, ne treba ništa imaginarno govoriti i prosipati maglu ovdje, konkretno šta ja to radim, ako imaš konkretan dokaz podnesi šta je to Načelnik uradio na ime i prezime.
- Svi oni koji na taj način žele pritiskom da izvuku nešto od Općinskog organa i Policijske stanice, odgovorno tvrdim dok sam ja tu neće to uspjeti.
- Problem i jest to, što ti ljudi misle da mogu nešto mimo zakona dobiti, e Boga mi neće, imaju pravne institucije ako Načelnik nije u pravu neka se žale, imamo izvršni organ, imamo predstavnički organ a ako nisu oni u pravu imamo sudstvo neka radi svoj posao.

- Odgovorno tvrdim da mi nećemo podleći prijetnjama, zastrašivanjima bez obzira o kome se radi
- I ubuduće u svojim izlaganjima govori konkretno, nemoj maglu prosipati i dezavujisati ovdje vijecnike

Crnica K.-replika

- Šta ste uradili, Vi koristite državne institucije, koristite Policijsku stanicu za obračun sa svojim političkim neistomišljenicima, osobama koje Vam trenutno smetaju i na osobama na kojima hoćete da kupujete buduće političke poene, eto šta ste uradili
- Hoćete konkretan primjer, od g-dina Zukića, g-dina Gekića i svih osoba s kojima Vi lično i predsjednik SDA imaju problem

Šarić J.-odgovori

- Kada sam se predstavljala predstavila sam se da sam zamjenica komandira PS Gornji Vakuf-Uskoplje, znači Zamjenik u odsustvu komandira g-dina Senada Latića
- „Balavac“ je termin koji Ja ni u snu ne bi koristila, pogotovo za ovlaštenu osobu, ovlaštenu službenu osobu
- Za policijske službenike na koje imate pritužbe treba da dođete do mene i da popunite obrazac koji ja prosljeđujem unutrašnjoj kontroli MUP-a
- Sve i jedan događaj koji se tiče sigurnosti građana naše općine, ne samo g-dina Seada Čauševića Općinskog načelnika ja sam evidentirala i on je prosljeđen drugim institucijama, što Kantonalnom tužiteljstvu, što Općinskom sudu kada su u pitanju prekršaji odnosno kazneno djelo.
- G-dine Crnica kad je u pitanju korištenje termina „Udba“ u svoj diskusiji, Ja Vam skrećem pažnju da ne koristite taj termin, rekla sam ako ima policijskih službenika koji zloupotrebljavaju svoja ovlaštenja i koriste i druga ovlaštenja, trebete doći u Policiju i prijaviti takve policijske službenike. Automatizmom ću iste poslati na disciplinski postupak.
- Što se tiče ulice „Gradska“, kada su u pitanju radari imam instrukciju da u svakom naseljenom mjestu moram staviti radar najmanje na sat vremena. Sve i do jedna općina na našem Kantonu ima radar, kako noćni tako i fiksni.
- Mislim da bi konkretno u ulici „Gradska“ dobro bilo postaviti „ležeće policajce“ jer se u ljetnim mjesecima i pred praznike povećava broj ljudi i djece
- Gledat ću i napraviti ću plan da u toj ulici u više termina bude radar ako ne dođemo do rješenja o kojem smo govorili.

Karamustafić N.-replika

- Postavio sam konkretno pitanje, što sam rekao „balavac“, mogao sam reći „neznalica“, mogao sam reći „čovjek bez škole“, kako će uzeti da napravi prekršajni nalog na mjestu gdje nije predviđeno.
- Ako sam ostavio vozilo ispod znaka gdje je zabranjeno imate me pravo kazniti, ali ako sam ostavio vozilo na mjesto gdje nema znaka, gdje nema ništa, nemate me pravo kazniti
- Morate znati da je bila specifična situacija, smrtni slučaj je bio, tu sam bio nekih dva sata, išao sam gore dole, davao sam injekcije.
- Rekao sam im da ću sutra doći do Komandira policije da mu objasnim o čemu se radi, taj policajac mi kaže; *žao ti dvadeset maraka*, to je taj pravi policajac

Batinić G.-predsjednik OV-a

- Dajem na usvajanje sljedeći Zaključak: *Općinsko vijeće Gornji Vakuf-Uskoplje prima na znanje Informaciju o radu Policijske stanice Gornji Vakuf-Uskoplje za 2020.godinu.*

Zaključak o Informaciji o radu Policijske stanice Gornji Vakuf-Uskoplje za 2020.godinu usvojen sa većinom glasova (19 «za», 3 suzdržana" , 0 „protiv")

Ad. 5.

Informacija o radu Biroa Gornji Vakuf-Uskoplje Službe za zapošljavanje SBK za 2020.godinu

Filipović A.-ispred izvjestioca

- Dao je kratko obrazloženje Informacije o radu Biroa Gornji Vakuf-Uskoplje Službe za zapošljavanje SBK za 2020.godinu

Diskusije:-

Batinić G.-predsjednik OV-a

- Dajem na usvajanje sljedeći Zaključak: Prihvata se Informacija o radu Biroa Gornji Vakuf-Uskoplje Službe za zapošljavanje SBK za 2020.godinu, od januara 2021.godine.

Zaključak o Informaciji o radu Biroa Gornji Vakuf-Uskoplje Službe za zapošljavanje SBK za 2020.godinu, od januara 2021.godine usvojen jednoglasno sa (20 «za)

Ad. 6.

Izveštaj o poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu

Blažević I.-ispred izvjestioca

- Dao je kratko obrazloženje Izveštaja o poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu
- Moram da kažem da nas koče stari dugovi koji su nastali 2001. godine spajanjem dva komunalna preduzeća „Izvor“ i „Uskoplje“
- Dug koji sam naslijedio odnosi se na doprinose, penzijsko osiguranje i on je iznosio 195.000,00 KM, ostalo je za riješiti nekih 55.000,00 KM
- Kad je u pitanju rad pumpi, očekujem da će trebati izdvojiti za njihov rad nekih 10.000,00 KM da bi stanovništvo naše općine imalo uredno snabdijevanje vodom u ovih 4-5 mjeseci kada je potrebno da pumpe rade.

Diskusije:

Blažević I.- ispred komisije za budžet i finansije i ekonomska pitanja

- Komisija za budžet i finansije je na svojoj sjednici održanoj 13.07.2021.godine razmatrala Izveštaj o finansijskom poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu, komisija daje pozitivno mišljenje o finansijskom poslovanju JKP «VIK» d.o.o. Gornji Vakuf-Uskoplje za 2020.godinu, te predlaže Općinskom vijeću da ga usvoji

Čaušević S.-Općinski načelnik

- Treba ova dugovanja zajedno sa menadžmentom preduzeća planski riješiti, ne trebaju se ostavljati neriješenim i mogu reći da sam nedavno prvi put čuo za ta dugovanja i ovo je prvi put da je neko iznio zvanične podatke u vezi dugovanja preduzeća
- Da je se u zadnjih 12 godina davalo od strane Općine po 5.000,00 KM mogli smo riješiti ta dugovanja i ne bi to bio problem za preduzeće
- Kad su u pitanju poslovi na nivou općine, vi ste JK preduzeće koje može aplicirati na sve projekte na općini, ali isto tako i na projekte van općine
- Uvijek nastojimo ako je to zakonski moguće da damo poslove na našoj općini našem preduzeću
- Kada je u pitanju rad pumpi, radili smo to i dosada, zajednički smo radili na postavljanju vodomjera, vi identifikujte probleme (otkrijete nelegalne potrošače) i mi ćemo Vam pomoći u rješavanju istih, rekao sam da Vam uvijek stojim na raspolaganju
- Upravljanje vodovodom Voljevac-Boljkovac-Dobrošin je u vašoj nadležnosti i treba ga staviti u sistem i da mještani plaćaju utrošak vode, sve nelegalne priključke otkriti i staviti ih u sistem

Karamustafić N.-BH Blok

- Moram da kažem da se u potpunosti slažem sa diskusijom Načelnika

- Prije deset godina kada je direktor bio Mlakić problem je bio isti, problem da se uvede u sistem vodovod Voljevac-Boljkovac-Dobrošin
- Potrebno bi bilo da imamo komunalnu policiju kako je praksa u drugim gradovima i da oni rješavaju te probleme u vezi vodovoda, krađe i neplaćanja vode
- Predlažem da direktor, Načelnik i Policija sjednu i da sve stvari dovedu u svoj tok kad je u pitanju snabdijevanje vodom
- Ružno je bilo kada nam se desio nestanak vode uoči Bajrama, žalosno je da općina koja leži na četiri-pet rijeka ima probleme sa vodom
- Vi ste Načelnice, SDA zajedno sa HDZ-om vlast na općini i to trebate riješiti da građani imaju uredno snabdijevanje vodom

Blažević I.-direktor

- Slažem se i Ja da je potrebno sjesti i riješiti navedene probleme, meni je dosadilo svake godine govoriti o istim problemima
- Predlažem da se oformi jedna komisija u kojoj bi bili predstavnici mjesnih zajednica, predstavnici sela, predstavnici vodovoda, evidentirati sve nelegalne priključke i iste staviti u sistem, idealno bi rješenje bilo kad bi to uradili kako smo uradili u Voljicu, to bi trebalo uraditi što prije

Batinić G.-predsjednik OV-a

- Dajem na usvajanje sljedeći Zaključak: *Prihvata se Izvještaj o poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu*

Zaključak o Izvještaju o poslovanju JKP «VIK»d.o.o. Gornji Vakuf-Uskoplje za 2020.godinu i Program rada za 2021.godinu usvojen jednoglasno sa (22 «za»)

Batinić G.-predsjednik OV-a

- Dajem pauzu od 10 minuta

(Pauza od 11⁵⁵ do 12⁰⁸)

Ad. 7.

Izvještaj o radu JKP «Radovina»d.o.o. Gornji Vakuf-Uskoplje za 2020.godinu i Plan rada za 2021.godinu

Šehić N.-direktor JKP „Radovina“

- Dao je kratko obrazloženje Izvještaja o radu JKP «Radovina»d.o.o. Gornji Vakuf-Uskoplje za 2020.godinu i Plan rada za 2021.godinu

Diskusije:

Jurina D.- ispred komisije za budžet i finansije i ekonomska pitanja

- Komisija za budžet i finansije je na svojoj sjednici održanoj 13.07.2021.godine razmatrala Izvještaj o finansijskom poslovanju JKP «Radovina» d.o.o. Gornji Vakuf-Uskoplje za 2020.godinu i Plan rada za 2021.godinu, komisija daje pozitivno mišljenje o finansijskom poslovanju JKP «Radovina» d.o.o. Gornji Vakuf-Uskoplje za 2020.godinu i Planu rada za 2021.godinu

Diskusije:

Karamustafić N.-BH Blok

- Rekli ste prošle godine da se ne vrši odvoz smeća u MZ Bojska, da zbog puta se ne može vršiti odvoz smeća u Zastinju i u Cvrču, interesuje me dali je put proširen i dali se vrši odvoz smeća u selu Zastinju i Cvrču

Hajrić A.-BH Blok

- Mislio sam postaviti pitanje; kada se planira odvoz smeća iz MZ Bojska, mislim da smo jedini koji nismo u sistemu odvoza smeća
- Pročitao sam ovaj izvještaj i mogu reći da je istinit, svaka Vam čast na tome, naveli ste i

prednosti i mane

- U potpunosti Vas razumijem kada kažete da Vam najveći problem predstavlja postojeća deponija, mislim da ćete teško naći novu lokaciju
- Trebamo podržati da se odvoz smeća vrši na način reciklaže i selekcije, interesuje me dali je ovo u procesu rješavanja

Gekić E.-BH Blok

- Na pretprošoj sjednici sam postavio pitanje u vezi kontejnera u ulici „Preporodova“, dobio sam odgovor da će Općinski načelnik imenovati komisiju za određivanje lokacija za neke male kontejnere.
- Interesuje me dali je ta komisija imenovana i kada se planira pristupiti rješavanju tog problema u ulici „Preporodova“

Krajina M.-HL

- Osvrnut ću se na onaj dio prihoda u 2020.godini, o tome sam govorio i na prošlim sjednicama vijeća kada je na dnevnom redu izvještaj JKP „Radovina“.
- Iz tabele 3. vidljivo je da je naplativost fakturisanih računa za građane 97%, moram da kažem da meni taj podatak upada u oko, daj bože da je to tako.
- Iz izvještaja JKP „VIK“ smo mogli vidjeti da su nenaplaćeni računi od građana skoro 300.000,00 KM a kod JKP „Radovina“ 6.800,00 KM, možda pomognete kolegi Blaževiću kako poboljšati tu naplatu za „VIK“
- Sumnjam kao vijećnik da knjižite samo one račune koji su naplaćeni, da ne knjižite sve, ako je to tako da je naplativost 97% ja Vam čestitam a ako nije gledajte da to ispravite u narednom periodu i da se onda knjiže svi računi radi neke bolje slike.

Čaušević S.-Općinski načelnik

- Želim se osvrnuti na onaj dio o kojem je govorio A. Hajrić, u ovoj godini nastojimo zajedno sa JKP „Radovina“ da obuhvatimo sva ona naseljena mjesta (iznad Voljevca i Pridvoraca) i MZ Bojska i Lužane.
- Sva ona mjesta gdje ne može ući vozilo komunalnog preduzeća odradit ćemo to kontejnerski u dogovoru sa Savjetima mjesnih zajednica i odredit ćemo lokacije gdje će biti postavljeni ti kontejneri
- Već evo nekih deset godina imamo problem u vezi naše lokalne deponije koja je dostigla svoj vrhunac, svoj maksimum i sa ovim dodatnim obuhvatom prikupljanja doći ćemo u situaciju da nećemo imati gdje odlagati smeće
- Općinsko vijeće treba riješiti ovaj problem, treba odrediti nove lokacije i zbog toga ću predložiti jednu tematsku sjednicu vijeća u vezi rješavanja ove problematike.
- Menađment JKP „Radovina“ treba nam pripremiti prijedlog za iznalaženja rješenja za ovaj problem
- Ovo što je konstatovao g-din Gekić, to je bilo u Programu rad Općinskog načelnika, komisija je uradila dobar dio posla zajedno sa stanarima zgrada, sa predstavnicima mjesnih zajednica i predstavnicima JKP „Radovina“, aplicirali smo za dodatna sredstva da se ta mjesta gdje će biti kontejneri uredi, ograde i natkriju da bi riješili problem kontejnerskog odvoza smeća.

Crnica K.-BH Blok

- Želim da dam par sugestija. Zastava u naselju Zvizde nije bila spuštena na pola koplja kada je bio dan žalosti, dan sjećanja na Srebrenicu, a isto tako nije bila spuštena na polja koplja za novu godinu kada se desila smrt sedam,osam osoba u Posušju a bio je dan žalosti.
- Predložio bih da se JKP „Radovina“ prebaci u nadležnost briga oko zastave i održavanje prostora kod zastave na Zvzdima
- Put pored greblja prema OŠ „Gornji Vakuf“, trebalo bi pokositi travu uz asfaltni put, djeca idu u školu, veoma je visoka trava, trebalo bi da komunalno preduzeće održava i kosi travu uz greblje i put, a tu je i školski park koji treba održavati i kositi.
- Put preko puta Ambulante je prokopan, velika je rupa na putu, znam da treba proći određeni period da se slegne nasip na rupi, mislim da bi trebalo staviti više nasipa do granice puta jer dolazi do oštećenja vozila prilikom prelaska na tom dijelu puta.
- Mislim da bi dobro bilo da se komunalno preduzeće uključi u malo kvalitetnije održavanje

prostora kod Slapa, Sahat kule,
da bi se te destinacije uredile kao turistička izletišta.

Partizanskog greblja izvora Trnovače,

Novaković M.-HL

- Prošle godine sam rekao da neke projekte na općini treba raditi JKP „VIK“ a radilo je JKP „Radovina“, nema veze važno je da se oni odrade
- Tu postoji negdje pregled vrijednosti potpisanih ugovora sa Općinom, to su one stvari oko odvodnje, dovodnje i dr. Stvari koje se tiču vode trebalo bi da radi JKP „VIK“, možda neke stvari koje radi JKP „VIK“ možda bi bilo bolje da radi JKP „Radovina“
- Načelnik je prošle godine govorio da bi najviše volio da je to jedno javno komunalno preduzeće, ako se Naser u ovom mandatu slaže sa Načelnikom u većini stvari, onda mogu i ja u jednoj
- Mislim da je za direktora najveći problem ovo što je na kraju napisao a to je da je JKP „Radovina“ isplatila cca 70.000,00 KM šteta trećim licima po sudskim presudama, na to sam na jednoj od prethodnih sjednica upozoravao
- Slažem se sa prijedlogom Načelnika da se zakaže tematska sjednica vijeća, ne samo po pitanju deponije nego to treba biti tematska sjednica za oba preduzeća

Šehić N.-direktor

- Sada naš kamion za odvoz smeća može doći u sva naselja tako i u Cvrče i Zastinje
- Kad je u pitanju kontejner u ulici „Preporodova“ Načelnik je odgovorio na to pitanje
- Što se tiče javnih površina, ono što si stavio na facebook, ono ne dolikuje nikome
- Prvo ono nije javna površina, postoji zakon o komunalnom redu koji definiše tačno šta je javna površina i šta spada u javnu površinu. Ono što se desilo onaj dan je problem tebe i mog radnika, mislim da je revoltom izazvano ili jednog ili drugog, neću da ulazim ko je kriv. Krajnje je neozbiljno i nekulturno nekoga nazvati „fašistom“ i sve ostalo šta si uradio.
- Što se tiče diskusije M. Krajina mogu reći da su podaci istiniti, mislim da je ovo četvrta godina da se ovo sve fakturiše. Imamo i preostalih dugovanja koja se izmiruju, naplata je se popravila jedino u privredi imamo starih dugovanja, uglavnom to je sve na sudu i uglavnom je presuđeno u našu korist.
- Načelnik je obrazložio ono o čemu je diskutovao K. Crnica
- Kazne za saobraćajne nesreće koje se dese od strane trećih lica u toku zimskog perioda predstavljaju nam veliki problem, veliki problem imamo sa sudstvom, u pravilu idu u korist tužitelja, tek ove godine smo prvi put dobili presudu da firma nije kriva

Gekić E.-replika

- G-dine kako tvrdite da je to odgovornost vašeg radnika, nadam se da ćete sankcionisati tog radnika
- Tvrdi da nije javna površina a dva puta sam dobio kaznu za nesavjesno parkiranje, odnosno moji klijenti jer su parkirali na toj zelenoj površini koja pripada objektu koji sam ja zakupio
- To je učinjeno ispred objekta koji sam ja zakupac, vaš komunalni radnik nije pokosio travu, ja sam to više iz cirkusa objavio, zato što se ponašate tako prema nama
- Ja sam građanin ove općine, uredno plaćam sve obaveze prema vama od kojih vi i vaši radnici primete plaću, nije me sramota jer ja vama plaćam platu
- Vi ste trebali postupiti drugačije, trebali ste vratiti vašeg radnika, ako je pokosio travu ispred deset poslovnih prostora trebao je pokositi i ispred jedanaestog
- Nadam se da ste sankcionisali tog radnika koji ima nešto lično protiv mene, kojeg ste vi nagradili zbog nekih stvari koje su učinjene prema meni i mojoj porodici.
- Ja sam to mogao riješiti na vrlo jednostavan način, koji se dešava sad upravo u Općini jer je narušena sigurnosna situacija, mogao sam to riješiti lično i privatno, ali sam išao institucionalno
- Toliko sam bio izrevoltiran prema vama i prema vašoj javnoj ustanovi, prema ustanovi kojoj sam ja uredan platiša

Šehić N.-direktor

- Opet ću ponoviti da ta površina ne pripada u našu nadležnost održavanja, ako ti imaš dokaz da to mi treba da održavamo onda je to druga stvar

- Meni je žao što je se to desilo na taj način, trebalo je to na fin način riješiti, da sam ja tu bio to bi se vjerojatno i riješilo, ali je ovo prešlo sve granice

- Zna se šta je javna površina, ko je radi i kako se održava, u čijoj je to nadležnosti, uopće ta površina nije u našoj nadležnosti, onaj put kompletan

Karamustafić N.-BH Blok

- Opet ćemo se vratiti na znak, propis, zakon.
- Nema znaka da je javna površina a dođe policija i naplatiti kaznu
- Nema znaka zabrane parkiranja, a dođe policija i naplatiti ti kaznu
- Pitam se ko je ovdje kriv; policija, mi koji gledamo taj zakon po znakovima ili Općinsko vijeće što nismo ovdje regulisali; jeli to javni put, jeli privatni put ili narodno dobro.

Prijčić S.-sekretar

- Brkate puno stvari ovdje, trebate znati šta je osnovna djelatnost preduzeća. Osnovna djelatnost preduzeća je prikupljanje otpada i ništa drugo, sve drugo je dopunska djelatnost
- Javne površine on održava po osnovu potpisanog ugovora sa Općinom, nije mu to redovan opis posla, to je mogao raditi neko drugi da je dobio na tenderu i tačno se zna koje se javne površine održavaju, koliko košta održavanje
- Želim da kažem da ni jedna stvar o kojoj je govorio Crnica K. nije osnovna djelatnost komunalnog preduzeća, nisu ni zastave, nisu ni javne, nisu ni zelene površine, sve je to nešto van toga

Gekić E.-replika

- Želim da kažem da je komunalni radnik na čelu sa direktorom Šehićem kosio zelene površine, ja ne znam jeli ona javna ili nije
- Suština ovdje je da se radi degradacija naroda, dijeljenjem na građane prvog i na građane drugog reda, to je suština, nije problem, pokošeno je to, desit će se to nekom desetom
- G-din Čaušević je rekao da se osjeća nesigurno, hoćete da napravimo da se i vaši radnici osjećaju nesigurno, pa nemojte nas tjerati nato, meni to ne treba.
- Zbog toga i takvih stvari su nam puste ulice, izadite prošetajte, svi se jedni drugih boje, bojimo se rukovati jedni s drugima, zbog sitnica koje nam prave probleme, nemojte da to radimo jedni drugima.
- Vi ste kontaktirani bili tri puta, ne možete meni reći, tri puta ste bili pozvani i dali ste odgovor; *da radnik možda nije imao vremena*, a radnik stoji pored mene tu.
- Vas ne bih spomenuo da to nisu bili vaši uposlenici

Crnica K.-replika

- Ako nije javna površina onda je još gore, radi privatno za vrijeme svog posla on radi za neke privatnike
- A prvi put sam izašao da budem konstruktivan, da ponudim nešto da idemo naprijed
- Nisam rekao da su javne površine, rekao sam da bi dobro bilo da se napravi saradnja između komunalnog preduzeća i općine Gornji Vakuf-Uskoplje kako se ne bi sramotili pred zastavom, kako ne bi zarastao put prema Ždrimačkom slapu.
- Mislim da ne znamo iskoristiti svoje potencijale, možda bi dobro bilo da općina Gornji Vakuf-Uskoplje i komunalno preduzeće krenu raditi na nekim konkretnim stvarima koje će pomoći općini.

Batinić G.-predsjednik OV-a

- Dajem na usvajanje sljedeći Zaključak: *Prihvata se Izvještaj o radu JKP «Radovina» d.o.o. Gornji Vakuf-Uskoplje za 2020.godinu i Plan poslovanja za 2021.godinu*

Zaključak o Izvještaju o radu JKP «Radovina» d.o.o. Gornji Vakuf-Uskoplje za 2020.godinu i Plan rada za 2021.godinu usvojen sa većinom glasova (18 «za», 3 „protiv”, 1 „suzdržan”)

Ad. 8.

Informacija o stanju i raspolaganju općinskom imovinom

Milanović A.-ispred izvjestioca

- Dao je kratko obrazloženje Informacije o stanju i raspolaganju općinskom imovinom

Diskusije:-

Batinić G.-predsjednik OV-a

- Dajem na usvajanje sljedeći Zaključak: *Općinsko vijeće Gornji Vakuf-Uskoplje prima na znanje Informaciju o stanju i raspolaganju općinskom imovinom, Službe za prostorno planiranje, imovinsko pravne poslove i katastar Općine Gornji Vakuf-Uskoplje.*

Zaključak o informaciji o stanju i raspolaganju općinskom imovinom usvojen sa većinom glasova (18 «za», 0 „protiv“, 4 „suzdržana“)

Ad.9.

Prijedlog Odluke o prestanku važenja Regulacionih planova na području Općine Gornji Vakuf-Uskoplje

Milanović A.-ispred predlagača

- Dao je kratko obrazloženje Prijedloga Odluke o prestanku važenja Regulacionih planova na području Općine Gornji Vakuf-Uskoplje

Diskusije:-

Batinić G.-Predsjednik OV-a

- Dajem na glasanje Prijedlog Odluke o prestanku važenja Regulacionih planova na području Općine Gornji Vakuf-Uskoplje

Prijedlog Odluke o prestanku važenja Regulacionih planova na području Općine Gornji Vakuf-Uskoplje usvojen sa većinom glasova (17 „za“, 3 „protiv“, 2 „suzdržana“)

Ad. 10.

Prijedlog Odluke o izmjenama i dopunama Odluke o usvajanju i sprovođenju urbanističkog plana grada Gornji Vakuf, skraćeni postupak

Milanović A.-ispred predlagača

- Dao je kratko obrazloženje Prijedlog Odluke o izmjenama i dopunama Odluke o usvajanju i sprovođenju urbanističkog plana grada Gornji Vakuf, skraćeni postupak

Diskusije:

Novaković M.-HL

- Čestitam ti na novoj funkciji i želim ti sreću u radu, imaš najteži posao, fino si nam to izložio i jasno nam je zašto i kako.
- Sam si rekao u svojoj diskusiji, i za prvu i za drugu tačku da je sve narušeno
- Budući da si krenuo raditi samo apelujem da nam ne dođeš nikad na sjednicu vijeća i da kažeš da smo nešto narušili, da ne bi morali ponovo donositi ovakve odluke i kada ne znamo šta može iz ovakvih odluka proizaći

Batinić G.-Predsjednik OV-a

- Dajem na glasanje sljedeći Zaključak: *Usvaja se Prijedlog Odluke o izmjenama i dopunama Odluke o usvajanju i sprovođenju urbanističkog plana grada Gornji Vakuf, skraćeni postupak*

Zaključak o Prijedlogu Odluke o izmjenama i dopunama Odluke o usvajanju i sprovođenju urbanističkog plana grada Gornji Vakuf, skraćeni postupak usvojen sa većinom glasova (18 „za“, 4 „protiv“, 0 „suzdržanih“)

Ad. 11.

Prijedlog Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, skraćeni postupak

Šišić S.-ispred predlagača

- Dao je kratko obrazloženje Prijedloga Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, skraćeni postupak

Diskusije:

Krajina M.-ispred komisije za statut i propise

- Član 6. stoji;... *Najveća dopuštena brzina u Pješačkoj zoni ograničena je na brzinu pješačkog hoda...*; komisija predlaže da stoji;... *Najveća dopuštena brzina u Pješačkoj zoni ograničena je na 10 km/h...*

Crnica K.-BH Blok

- Koliko sam ja ovdje shvatio, pješačka zona je skraćena i ona ide od „Fontane“ do „Džamije Mehmed bega Stočanina“, to je taj neki bošnjački dio, dali je slučajno ili namjerno neću ulaziti u to.
- Predložio bih konkretno da pješačka zona ide od „Srednje škole“ do „Džamije Mehmed bega Stočanina“

Batinić G.-predsjednik OV-a

- Samo ću vas posjetiti na član 117.; *da se prijedlog za izmjenu i dopunu akta podnosi u obliku amandmana...*; dakle ovo je forma prijedloga odluke

Karamustafić N.-ispred kluba BH Blok

- Mi nećemo podržati ovaj Prijedlog Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, jer je ovo diskriminirajuća Odluka, zakon treba da važi za cijeli grad a ne samo za jedan dio grada
- Dobro se zapitajte šta će usvajanje jedne ovakve odluke izazvati

Batinić G.-predsjednik OV-a

- Dajem na usvajanje sljedeći Prijedlog Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, skraćeni postupak, uz sugestiju komisije za statut i propise

Prijedlog Odluke o uspostavi pješačke zone u urbanom dijelu naseljenog mjesta Gornji Vakuf-Uskoplje, skraćeni postupak, uz sugestiju komisije za statut i propise usvojen sa većinom glasova (17 „za“, 1 „suzdržan“, 4 „vijećnika se nisu izjasnila“)

Ad. 12.

Prijedlog Odluke o izmjeni Odluke o sigurnosti prometa na cestama i ulicama Općine Gornji Vakuf-Uskoplje, skraćeni postupak

Šišić S.- ispred predlagača

- Dao je kratko obrazloženje prijedloga Odluke o izmjeni Odluke o sigurnosti prometa na cestama i ulicama Općine Gornji Vakuf-Uskoplje, skraćeni postupak

Diskusije:-

Batinić G.-predsjednik OV-a

- Dajem na usvajanje Prijedlog Odluke o izmjeni Odluke o sigurnosti prometa na cestama i ulicama Općine Gornji Vakuf-Uskoplje, skraćeni postupak

Prijedlog Odluke o izmjeni Odluke o sigurnosti prometa na cestama i ulicama Općine Gornji Vakuf-Uskoplje, skraćeni postupak usvojen sa većinom glasova (17 „za“, 0 „protiv“, 2 „suzdržana“, 1 „vijećnik se nije izjasnio“)

Ad. 13.

Prijedlog Odluke o utvrđivanju Liste istaknutih stručnjaka Općine Gornji Vakuf-Uskoplje za popunu Komisije za koncesije

Čaušević S.-ispred predlagača

- Dao je kratko obrazloženje Prijedloga Odluke o utvrđivanju Liste istaknutih stručnjaka Općine Gornji Vakuf-Uskoplje za popunu Komisije za koncesije
- Komisiju za koncesije imenuje Vlada SBK, na prijedlog nadležnog ministarstva, a za predmete dodjele koncesija u skladu sa stavom 2. člana 4. Zakona o koncesijama, Komisija broji pet članova od kojih su dva promjenjiva člana koje imenuje ministar nadležnog ministarstva sa liste koje utvrdi općinsko vijeće lokalne zajednice na čijem području se nalazi predmet koncesije.
- Predlažem Listu istaknutih stručnjaka Općine Gornji Vakuf-Uskoplje za popunu Komisije za koncesije, kako slijedi:

1. Bukarić Ensar, dipl.ing.maš.,
2. Matijanić Branko, dipl.pravnik,
3. Abazović Mugdim, dipl.ing.građ.,
4. Blažević Igor, dipl.ecc,
5. Bajraktarević Ismihan, dipl.pravnik,
6. Šain Branko, dipl.ing.građ.

Diskusije:-

Batinić G.-predsjednik OV-a

- Dajem na usvajanje Prijedlog Odluke o utvrđivanju Liste istaknutih stručnjaka Općine Gornji Vakuf-Uskoplje za popunu Komisije za koncesije

Prijedlog Odluke o utvrđivanju Liste istaknutih stručnjaka Općine Gornji Vakuf-Uskoplje za popunu Komisije za koncesije usvojen sa većinom glasova (17 „za“, 2 „suzdržana“, 1 „vijećnik se nije izjasnio“)

Ad. 14.

Razmatranje inicijativa Kluba vijećnika BH Blok:

Batinić G.-predsjednik OV-a

- Podsjećam da smo na početku sjednice na prijedlog kolege Crnica K. odustali od pod tačke b)
- Želim da kažem da smo mi na protokol Općinskog vijeća 07.04.2021. godine dobili dvije inicijative kluba vijećnika BH Blok, a iste su na osnovu člana 99. Poslovnika o radu Općinskog vijeća Gornji Vakuf-Uskoplje prosljeđene nadležnoj JU Dom zdravlja kao i Općinskom načelniku čije ste odgovore dobili u materijalima.
- Kako smo se usaglasili pod a) je bila *Inicijativa od 07.04.2021.godine*; da se osposobe i stave u funkciju prostori za ambulante u MZ Bojska, Voljice i Pajić Polje.
- Pozivam predstavnika BH Bloka da nam obrazloži ove inicijative

a) Inicijativa od 07.04.2021.godine

Hajrić A.-BH Blok

- Dao je kratko obrazloženje Inicijative od 07.04.2021.godine u vezi uspostave područnih ambulanti u naseljima Bojska, Voljice i Pajić Polje

Diskusije:

Čaušević S.-Općinski načelnik

- Evo dobili smo odgovor od JU Dom zdravlja i vidjeli ste šta u njemu stoji
- Mogu vam reći da je prije nekih deset ako ne i dvanaest godina ambulanta u MZ Voljice bila kompletirana, opremljena ali nikada nije stavljena u funkciju, zašto ne znam to ne možemo jer je direktor otišao.

- Smatram da se ovo pitanje treba vratiti novom menadžmentu i službama i da iste odgovore u smislu kadrovskih, najmanje je ovdje u smislu opremanja prostora, problem je u kadrovskom zatvaranju navedenih ambulanti.
- U sadašnjoj situaciji do popune određenog medicinskog kadra, prvenstveno doktora medicine, smatram da nam menadžment ustanove treba pripremiti određene statutarne dokumente da bi mi onda mogli podržati ovu inicijativu na Općinskom vijeću.

Novaković M.-HL

- Ova inicijativa je dobra kada bi se mogla realno napraviti, realno mogućnosti apsolutno nema barem za ovu godinu
- Glavni razlog je manjak kadra, prije svega doktora, u odnosu na prošlu godinu trenutno je manje šest doktora, Voljevac ambulanta nema doktora
- Mislim da bi se o ovome na budućim sjednicama moglo pričati, sada je prerano jer nedostaje doktora, mislim da novi menadžment treba na ovu inicijativu da dadne svoje mišljenje

Gekić E.-ispred kluba BH Blok

- Da ne bi ovo ostalo samo na diskusijama klub BH Blok predlaže Zaključak da se ova Inicijativa od 07.04.2021. godine prosljedi novom menadžmentu Doma zdravlja
- Mi ćemo kao klub ponovo kad se steknu uslovi, kada bude dovoljno doktora da ostanemo pri ovoj inicijativi, koliko vidim svi smo se složili da je ona potrebna i od strane uposlenika i od strane Načelnika, a sigurno bi i narod imao koristi od toga.

Batinić G.-predsjednik OV-a

- Dajem pauzu od 5 minuta

(Pauza od 13¹⁵ do 13²⁰)

Batinić G.-predsjednik OV-a

- Dajem na usvajanje sljedeći Zaključak:
 1. *Općinsko vijeće Gornji Vakuf-Uskoplje prihvata Inicijativu Kluba vijećnika BH Blok u Općinskom vijeću Gornji Vakuf-Uskoplje, od 07.04.2021.godine.*
 2. *Zadužuje se Uprava JU Dom zdravlja Gornji Vakuf-Uskoplje i Općinski načelnik Općine Gornji Vakuf-Uskoplje da sagledaju mogućnost uspostave područnih ambulanti u naseljima Bojska, Voljice i Pajić Polje i tome obavijeste Općinsko vijeće Gornji Vakuf-Uskoplje.*

Zaključak o inicijativi Kluba vijećnika BH Blok od 07.04.2021.godine usvojen jednoglasno (20 „za“)

Ad. 15.

Prijedlog Odluke o izmjeni Odluke o sastavu Kolegija VI saziva Općinskog vijeća Gornji Vakuf-Uskoplje

Duratbegović N.-ispred komisije za izbor i imenovanje

- Dao je kratko obrazloženje Prijedloga Odluke o izmjeni Odluke o sastavu Kolegija VI saziva Općinskog vijeća Gornji Vakuf-Uskoplje
- U članu 1. Odluke o sastavu Kolegija VI saziva Općinskog vijeća Gornji Vakuf-Uskoplje («Službeni glasnik Općine Gornji Vakuf-Uskoplje», br. 1/21) tačka 4. mijenja se i glasi:

„ 4. *Marinko Krajina, član*
/Ivica Žuljević/zamjenik člana,

Diskusije:-

Batinić G.-predsjednik OV-a

- Dajem na glasanje Prijedlog Odluke o izmjeni Odluke o sastavu Kolegija VI saziva Općinskog vijeća Gornji Vakuf-Uskoplje

Prijedlog Odluke o izmjeni Odluke o sastavu Kolegija VI saziva Općinskog vijeća Gornji Vakuf-Uskoplje usvojen sa većinom glasova (17 „za“, 3 „vijećnika se nisu izjasnila“)

Sjednica završena u 13²⁵ sati.

SEKRETAR

Prijić Senad

ZAPISNIČAR

Redžić Hidajet

PREDSJEDNIK
OPĆINSKOG VIJEĆA

Batinić Goran